

Na opinion di MEP:

Experto acustico a bari raport di KEMA for di mesa

ROBERT Rand, di Rand Acoustics, dialuna ultimo a duna dos charla riba invitacion di Residentenan Afecta di Urirama. Miembronan di MEP tabata presente na ambos presentacion, unda por cierto miembronan di AVP ni miembronan independiente Lopez Tromp y Wyatt Ras a keda sin presenta. Sr. Rand a revisa henter e raport di KEMA. E raport di KEMA ta bisa cu e molinanan di biento lo no tin ningun efecto negativo riba ningun hende. Porcierto, e mesun raport aki fraccion di AVP ta pone Gobierno di Aruba


paga miles y miles di euro pa laga revisa, siendo cu e raport su base ta completamente fout. Pero desde un principio tabatin hopi duda den e raport di KEMA, pasobra t'e desaroyador mes a paga p'e raport aki, y tur hende sa cu "wie betaalt bepaalt", y den e caso aki e desaroyador sigur lo no a permiti KEMA menciona nada negativo di e proyecto. Y awor un experto den sonido a desbarata e raport. sr. Robert Rand a elabora riba solamente 7 punto for di cual e ta conclui cu e raport no ta bon. E ta sigur cu

tin hopi mas punto, pero p'awor el'a limita su mes na 7 punto di cual e ta di opinion cu KEMA a equiboca su mes. Nan ta puntanan bastante tecnico, cu ta relata n'e forma cu a midi e sonidonan caminda no a elimina e efecto di biento.

Tambe p.e. e criteria di 41dBA, cual ta pa sonido di trafico, mientras cu esun di molina di biento no por wordo compara cu trafico, pasobra e sonido di molina di biento ta causa hopi mas molester. Den reunion cu Gabinete di Minister, a keda palabra cu sr. Robert Rand lo manda su puntanan por escrito p'asina Gobierno manda esakinan pa KEMA por reacciona riba nan. Ta increible cu un compania manera KEMA por equiboca su mes, no un biaha, sino por lo menos 7 biaha, segun MEP.

PROFESIONAL CAUTION

Sr. Robert Rand a manda un aviso pa Gobierno di Aruba, un



asina yama 'professional caution' den cual e ta bisa Gobierno cu e ta tuma mucho riesgo di pone e molinanan asina serca di un area hopi habita pa hende. E molinanan ta mucho serca di 910 cas, afectando asina 2700 persona directamente. Ta di mira kico Gobierno lo haci cu e informacion aki, pasobra MEP tambe a haci investigacion y e

reputacion di Rand Acoustics ta hopi bon mundialmente y ta wordo considera expertonan den e area aki.

Awor cu Gobierno tin den su poder por escrito un opinion di un experto acustico, dificilmente por kere e raport di KEMA y di Vader Piet cu ta bisa cu e molinanan NO tin efecto negativo riba salud di hende.

STICHTING VIANA CHARITY FUND

Ta un fundacion cu tin como meta duna donacion Na organisacionnan cu ta existi legalmente y cu, a base caritativo, ta traha ariba tereno social. Nos Fundacion ta reuni anualmente.

Pa tradicion na

Final di anja, fundacion, asociacion of otro gruponan, cu ta existi legalmente, cu ta cumpli cu e meta di nos fundacion y cu ta desea pa bini na consideracion pa un donacion, por entrega nan peticionnan hunto cu e relato financiero y di actividad di 2011, pa mas tarda

November 15, 2012. Peticionnan cu wordo entrega despues di e fecha stipula, no ta bini na remarca pa un donacion. Peticionnan hunto cu e otro documentonan, mester wordo entrega na nos secretario, Sr. Ebby Arends, Tunastraat 6, Ponton, Cel: 594-1902

MEP ta reacciona riba expresion di Juan David Yrausquin tocante Urirama

PARTIDO MEP cu hopi asombro a tuma nota di expresion di Parlamentario Juan David Yrausquin **tocante e presentacionnan** di expertonan di Urirama. Segun Juan David Yrausquin, Parlamento a cumpli cu e peticion di e residentenan afecta, ora fraccion di AVP a pidi pa un instancia imparcial evalua e raport di MER di KEMA.

Juan David Yrausquin no ta realisa cu hama bo por haya un opinion imparcial riba un raport cu ta sumamente parcial. Juan David Yrausquin ni fraccion di AVP a consulta cu demas Parlamentarionan prome cu a cuminsa cu e aventura aki, cu porcierto ta costa pueblo di Aruba 42 mil florin. Ta hopi **straño si cu Juan David Yrausquin** ta sconde su cabes bou tera, e no kier scucha nada otro, y ta keda solamente habri pa

scucha di esnan cu nan a paga 42 mil florin. "Aki bo tin un caso den cual cuidadanonan a gasta mas di 30 mil florin pa por yega asina leu, y e Parlamentario na forma masha arogante ta djis bari esey for di mesa. Esey nos ta lamenta profundamente. Trabou di un Parlamentario ta pa busca su propio informacion, di haci investigacion su mes, y sigur no di hunga politica di avestrus y dicidi su mes kico e kier of no kier scucha", segun Evelyn Wever Croes. Si Juan David Yrausquin, enbes di bay fiesta y sende lus na un rotonde, a scoge pa bay scucha e expertonan y educa su mes, lo e por a haya un poco mas informacion, y lo a pasa pa menos ignorante. Y si e tin tanto problema cu e estudio di e expertonan cu e residentenan a trece pa duna e charla, dicon e no a bay p'e

mes por a cuestiona e expertonan, manera MEP si a haci. Esey lo a demostra curashi. Sr. Yrausquin a ataca e grupo di residentenan di Noord cu a bin cu e tremendo iniciativa, cu di nan propio medio a haci tur e gastonan, y awor ta wordo ataca pa un Parlamentario. Esey ta lamentable. Partido MEP awor mas cu nunca ta convenci cu mester para e proyecto aki, y a pidi Presidente di Parlamento pa accelera e reunion aki. Presidente di Parlamento a priminti cu den e siguiente simannan e reunion lo wordo yama. Pa MEP esey ta mucho largo, pasobra cada dia trabou nan ta continua n'e sitio na Urirama, y un djis e desaroyador por pone su mes riba e punto di bista cu ela pasa e «point of no return» caba. Y ken ta para responsabel e ora? Parlamento di Aruba?

arubus

Ta anuncia cu entrante 1 November 2012, e ticket nan cu tin ainda solamente por wordo poni riba Smartcard na Arubus su oficina na Sabana Blanco. E ticket nan lo no por wordo recarga mas na ningun punto di recarga, solamente na Arubus Sabana Blanco. Tuma bon nota di esaki !!!